

# Borgmesterit soraarnerussutisiaat qinigaajunnaarnersiutaallu aammalu taakkua aappaasa meeraasalu taakkuninnga piissarsisinnaaneri pillugit Namminersorlutik Oqartussat nalunaarutaat

Kommunit aqunneqarnerat pillugu Inatsisartut inatsisaanni nr. 22, 18. november 2010-meersumi § 67 imm. 1 naapertorlugu aalajangersarneqarpoq:

## § 1. Borgmesteri nammineq soraarnerussutisiaqarnissaminut

qinigaajunnaarnersiuteqarnissaminullu §§-ini 2-miit 7-imut aammalu 9-miit 10-mut malittarisassat naapertorlugit pisinnaatitaaffeqarpoq.

*Imm. 2. Aappaasoq meeqqallu borgmesterip toqukkut peerunneratigut qimataasut §§-ini 8-mi 11-milu malittarisassat naapertorlugit soraarnerussutisianut qinigaajunnaarnersiutinullu pisinnaatitaaffeqarput.*

### *Nammineq soraarnerussutisiaat*

§ 2. Borgmesterip tunuarnermini nammineq soraarnerussutisiassai ukiut soraarnerussutisiassaqarfissai akissarsiaalu soraarnerussutisiaqaatissat naapertorlugit aalajangersarneqartassapput.

§ 3. Nammineq soraarnerussutisiassaqalernissamut ikinnerpaamik ukiuni arfineq-pingasuni sulereersimanissaq piumasaqataavoq, takuulli imm. 4.

*Imm. 2. Piffissaq suliffiusoq tassaavoq piffissaq pineqartup borgmesteritut suliffigisaa aammalu ukiuni qinigaaffinni arlalinni borgmesteritut sulisarsimanerit ilanngunneqartassallutik.*

*Imm. 3. Piffissaq suliffiusoq ukiunut ilivitsunut aammalu ukiup sulilerfiup aallartiffianit naatsorsorneqartassaaq.*

*Imm. 4. Borgmesteri nappaamik nakorsap uppernarsaasiinera naapertorlugu borgmesteritut suleqqinnissaminut akornuserneqarluni kommunalbestyrelsip akuersineratigut tunuarpat piffissaq suliffiusoq piffissamut tunuarnerup nalaani qinigaaffimmut tamakkiisumut naatsorsorneqartassaaq.*

§ 4. Ukiut borgmesterip soraarnerussutisiassaqarfissai piffissap suliffiusup naatsorsorneqartarnera naapertorlugu ima naatsorsorneqartassapput:

Piff. borgmesteriuffik: Ukiut soraarnerussutisiassaqarfissat:

Ukiut 8-nit 10-nut	Ukiunut 28-nut naatsorsorneqassapput
Ukiut 10-nit 12-inut	Ukiunut 30-nut naatsorsorneqassapput
Ukiut 12-init 14-inut	Ukiunut 31-nut naatsorsorneqassapput
Ukiut 14-init 16-inut	Ukiunut 33-nut naatsorsorneqassapput
Ukiut 16-init 18-inut	Ukiunut 34-nut naatsorsorneqassapput
Ukiut 18-init 20-nut	Ukiunut 36-nut naatsorsorneqassapput
Ukiut 20-it sinnerlugillu	Ukiunut 37-nut naatsorsorneqassapput

**§ 5.** Borgmesteri nammineq soraarnerussutisisalissaq borgmesteritut tunuarnermi nalaani nalinginnaasumik soraarnerussutisisalersussatut 60-inik ukioqalereersimaguni imaluunniit ullormit taama utoqqaatigilerfimminti.

**§ 6.** Nammineq soraarnerussutisat tunuarnerup kingornagut tunniunneqartarnerisalu nalaani malittarisassat nunatsinni tjenestemandinut atuuttut naapertorluginit naatsorsorneqartarlutillu akit allanngorarnerinut iluarsiissuteqarfingineqartassapput.

**§ 7.** Nammineq soraarnerussutisiaqalernissaq aallartittarpoq § 9 naapertorlugu piffissaq qinigaanersiutaaruffik qaangiukkaangat.

*Imm. 2. Pineqartoq borgmesteritut qinigaqqippat soraarnerussutisiaqartitsineq unitsinneqassaaq.*

#### *Aappaasup meeqqallu soraarnerussutisiaqartitaanerat*

**§ 8.** Aappaasoq meeqqallu soraarnerussutisiaqartinneqartassapput malittarisassat nunatsinni tjenestemandinut atuuttut naapertorluginit.

*Imm. 2. Naak borgmesteritut sulinerup qaangiutereerneratigut appariilersoqaraluartoq nalunaarut manna malillugu aappaasoq aappaasutut tamatigut soraarnerussutisiaqarsinnaatitaavoq. Taamatuttaaq meeqqat meerarisatut soraarnerussutisiaqarsinnaatitaapput naak borgmesteritut sulinerup qaangiutereerneratigut inunngoraluarlutik.*

#### *Qinigaajunnaarnersiutit*

**§ 9.** Borgmesteri qinigaajunnaarnersiuteqartinneqartassaaq qaammammut pineqartup ukioq kingulleq sulinermi akissarsiaasa 1/12-iannik. Ukiut aallartinneqartut pineqartup borgmesteritut suliffisai tamarmik qaammatip aappaata affaanik sivisussusilimmik qinigaajunnaarnersiuteqaatissaapput. Piffissarli qinigaajunnaarnersiuteqarfissaq sivisunerpaamik qaammatinik 12-inik sivisussuseqarsinnaavoq.

**§ 10.** Borgmesterip tunuarnera pinerluttulerinermi inatsit naapertorlugu peqqussuteqarnermik nakkutigineqartussaanermilluunniit pissuteqarluni qinigaasinnaajunnaarnermik kinguneqarsimappat kommunalbestyrelsip inassuteqareerneratigut naalakkersuisunit aalajangerneqassaaq borgmesteri

nalunaarummi matumani malittarisassat naapertorlugin qinigaajunnaarnersiu-teqarsinnaatitaassanersoq.

*Aappaasup meeqlalu qinigaajunnaarnersiutinik pissarsisinnaanerat*

**§ 11.** Borgmesterip toqukkut peerunnini tikillugu borgmesteritut sulisup imaluunniit toqukkut peerunnini tikillugu borgmesterip qinigaajunnaarnersiutaanik pissarsisartup aappaa piffissap qinigaajunnaarnersiuteqarfiup sinnerani, sivisunerpaamilli borgmesterip imaluunniit borgmesteriusimasup toquneraniit qaammatini pingasuni, qinigaajunnaarnersiutinik pisartagaqarsinnaavoq.

*Imm. 2.* Borgmesteri toqukkut aappaminik qimataqanngippat qimataasorluunniit piffissap qinigaajunnaarnersiuteqarfiup qaangiutinnginnerani toqukkut peeruppat qinigaajunnaarnersiuteqarsinnaaneq borgmesterip meeraanut suli 18-iliisimanngitsunut, borgmesterip toqukkut peerunnerani tassannga angajoqqaatut oqartussaaffigisaasunut, pisinnaatitaaffinngussaaq.

*Soraarnerussutisianik il.il. naatsorsuineq tunniussinerlu*

**§ 12.** Soraarnerussutisianik qinigaajunnaarnersiutinillu naatsorsuineq, nalunaarut manna borgmesterinut soraarnerussutisiat imaluunniit taassuma aappaanut meeraanullu siusinnerusukkut malittarisassat atuuttut naapertorlugin tunniunneqartartut kommunimi borgmesteriusimasup kingullermik borgmesteriuffigisimasaani kommunimi kommunalbestyrelsimit isumagineqartassaaq.

*Imm. 2.* Imatut pisuni, tassani borgmesteri kingullermik borgmesteritut sulismalluni kommunimi kommuniniluunniit 1. januar 2009 tikillugu kommuniusimasuni, kommunimi siusinnerusukkut kommuniusimasumi kommunalbestyrelsimit borgmesteriusimasumut imaluunniit taassuma aappaanut meeraanullu soraarnerussutisiat naatsorsorneqarnerat tunniunneqarnerallu isumagineqartassapput.

**§ 13.** Borgmesterimut soraarnerussutisiat qinigaajunnaarnersiutillu, kommunimi ataatsimik amerlanerusumi qinigaasimanermut tunngasut, kommuninit pineqartunit annertoqatigiaartumik akissarsiatut tunniunneqartassapput.

*Atortuulersitsinermut aalajangersakkat*

**§ 14.** Nalunaarut una atuutilissaqq ulloq 1. juni 2012 1. januar 2011-miit atuutilersumik.

*Imm. 2.* Borgmesterit qinigaajunnaarnersiutaat soraarnerussutisiaallu aammalu taakkua aappaasa meeraasalu taakkuninnga pissarsisinnaaneri pillugit Namminersornerullutik Oqartussat nalunaarutaat nr. 23, 12. september 1997-imeersoq ilutigalugu atorunnaarsinneqarpooq 1. januar 2011-mi atuutilersumik.

Namminersorlutik Oqartussat, ulloq 24. maj 2012

Kuupik Kleist

/

Hans-Erik Bresson

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaquataasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut